

Na osnovu člana VI 2.(2) Ustava Federacije Bosne i Hercegovine («Službene novine Federacije Bosne i Hercegovine» br:1/94 i 13/97), člana 66. Ustava HNK («Službene novine HNK» broj:2/98), člana 58. Zakona o principima lokalne samouprave u Federaciji Bosne i Hercegovine («Službene novine Federacije Bosne i Hercegovine», broj: 49/06), člana 41. Zakona o lokalnoj samoupravi («Službene novine HNK» broj:4/00) i člana 10. Zakona o izboru, prestanku mandata opozivu i zamjeni Načelnika Općina u FBiH, («Službene novine Federacije Bosne i Hercegovine», broj 19/08), člana 35. Statuta Općine Konjic («Službeni glasnik Općine Konjic» broj: 4/01; 5/04 i 3/08) Općinsko vijeće Konjic, na sjednici održanoj dana 09.06.2011.godine, usvojilo je:

S T A T U T Općine Konjic

I – OPĆE ODREDBE

Član 1.

Ovim Statutom, u skladu sa ustavom i zakonom, uređuje se: statusna obilježja, samoupravni djelokrug, organi, međusobni odnosi organa, mjesna samouprava, neposredno učestvovanje građana u odlučivanju, finansiranje i imovina, budžet, propisi i drugi akti, javnost i transparentnost, promjena Statuta, zaštita prava na lokalnu samoupravu, odnosi i saradnja sa federalnim i kantonalnim vlastima i ombudsmenima, saradnja i udruživanje Općine, upravni nadzor u oblasti lokalne samouprave, povjeravanje javnih ovlaštenja iz samoupravnog djelokruga kao i druga pitanja od značaja za organizaciju i rad Općine Konjic.

Član 2.

Općina Konjic je jedinica lokalne samouprave uspostavljena zakonom sa pravima i obavezama utvrđenim Ustavom i Zakonom.

Općina Konjic je pravno lice.

Član 3.

U obavljanju poslova iz svoje nadležnosti Općina će poštovati osnovna prava i slobode svakog svoga građanina i konstitutivnih naroda: Bošnjaka, Hrvata i Srba zajedno sa ostalim, te će osigurati u najvećoj mogućoj mjeri njihovu zastupljenost u skladu sa članom IX 11. a. Ustava Federacije Bosne i Hercegovine.

U tom cilju Općina će osigurati jednaka prava i zalagati se za jednake životne uslove svih svojih građana, uvažavajući nacionalni, vjerski i kulturni identitet i podsticati će njihov miroljubivi suživot.

II – STATUSNA OBILJEŽJA OPĆINE

Član 4.

Naziv Općine je: Općina Konjic.

Sjedište Općine je u ulici M.Tita 62.

Član 5.

Područje općine je dio državnog teritorija Bosne i Hercegovine i Federacije Bosne i Hercegovine.

Općina je u sastavu Hercegovačko-neretvanskog kantona.

Član 6.

Općina Konjic predstavlja stanovništvo Općine Konjic, štiti njihov interes i promovira razvoj.

Područje i granice Općine utvrđene su posebnim zakonom.

Izmjena postojećih granica Općine zahtijeva obaveznu prethodnu saglasnost Općinskog vijeća.

Područje Općine obuhvata slijedeća naseljena mjesta i to:

Argud, Bale, Bare, Barmiš, Bijela, Bjelovčina, Blace, Blučići, Boždarevići, Borci, Bradina, Brda, Brđani, Budišnja Ravan, Bukovica, Bukovlje, Bulatovići, Bušćak, Buturović Polje, Čelebići, Čelina, Cerići, Česim, Čičevo, Crni Vrh, Čuhovići, Džajići, Džanići, Džepi, Din Do, Dobričevići, Doljani, Dolovi, Donja Vratna Gora, Donje Selo, Donje Višnjevice, Donji Čažanj, Donji Gradac, Donji Nevizdraci, Donji Prijeslop, Došćica, Dužani, Dubočani, Duboko, Dubravnice, Dudle, Falanovo Brdo,

Gakići, Galjevo, Gapići, Glavatičevo, Gobelovina, Gorani, Goransko Polje, Gorica, Gornja Vratna Gora, Gornje Višnjevice, Gornji Čažanj, Gornji Gradac, Gornji Nevizdraci, Gostovići, Grabovci, Gradeljina, Grušča, Hasanovići, Herići, Homatlije, Homolje, Hondići, Hotovlje, Idbar, Jasenik, Javorik, Ježeprosina, Jezero, Jošanica, Kale, Kanjina, Kašići, Kostajnica, Koto, Krajkovići, Kralupi, Krtići, Krupac, Kruščica, Kula, Lađanica, Lisičići, Ljesovinja, Ljubuča, Ljusići, Ljuta, Ljuta, Lokva, Luka, Luko, Lukomir, Lukšije, Mirac, Mladeškovići, Mokro, Mrkosovice, Obrenovac, Obri, Odžaci, Orahovica, Orlišće, Oteležani, Ovčari, Pačerani, Parsovići, Plavuzi, Požetva, Podhum, Podorašac, Pokojište, Polje, Polje Bijela, Prevlje, Radešine, Rajac, Raotići, Rasvar, Razići, Redžići, Repovci, Repovica, Ribari, Ribići, Seljani, Seljani, Seonica, Sitnik, Slavkovići, Solakova Kula, Sopot, Spiljani, Sreće, Stojkovići, Strgonice, Studenčica, Sultići, Šunji, Svijenča, Tinje, Tovarnica, Treboje, Trešnjevica, Trusina, Tuhobići, Turija, Ugošće, Veluša, Vinište, Vrbļjani, Vrci, Vrdolje, Zabrdani, Zabrdē, Zagorice, Zaslivlje, Zelomići, Zukići i Živašnica.

Član 7.

Općina ima pečat kojim se potvrđuje izvornost službenih akata Općine i njenih organa, a bliže odredbe o pečatu utvrđuju se općim aktom Općinskog vijeća u skladu sa zakonom.

Općina ima grb i zastavu, kao i druge simbole čiji izgled utvrđuje Općinsko vijeće posebnom odlukom u skladu sa zakonom.

Općina ima svoj dan koji se utvrđuje odlukom Općinskog vijeća.

Povodom dana općine dodjeljuju se općinska priznanja što se uređuje posebnom odlukom Općinskog vijeća.

Član 8.

Službeni jezici u Općini su bosanski, hrvatski i srpski jezik. Službena pisma su latinica i ćirilica. Ostali jezici mogu se koristiti kao jezici komunikacije.

III - SAMOUPRAVNI DJELOKRUG OPĆINE

Član 9.

Općina je, u okviru svoga samoupravnog djelokruga, samostalna u odlučivanju o pitanjima i poslovima iz vlastite nadležnosti koje ne mogu biti ograničene ili uskraćene od federalnih ili kantonalnih vlasti osim u slučajevima i u okvirima utvrđenim ustavom i zakonom, odnosno podliježe samo nadzoru ustavnosti i zakonitosti ovlaštenih državnih organa

Član 10.

Općina u okviru samoupravnog djelokruga, u skladu sa ustavom i zakonom ima vlastite nadležnosti, u okviru kojih naročito obavlja poslove koji se odnose na:

1. Osiguranje i zaštitu ljudskih prava i osnovnih sloboda navedenih članovima II A. 1-7. Ustava Federacije BiH, Ustava BiH i Evropske konvencije za zaštitu ljudskih prava ,
2. Donošenje budžeta Općine;
3. Donošenje programa i planova razvoja Općine i stvaranje uslova za privredni razvoj i zapošljavanje;
4. Utvrđivanje i provođenje politike uređenja prostora i zaštite čovjekove okoline;
5. Donošenje planova prostornog uređenja, i provedbenih planova uključujući zoniranje;
6. Utvrđivanje i provođenje stambene politike i donošene programa stambene i druge izgradnje.
7. Utvrđivanje politike korištenja i utvrđivanje visine naknade za korištenje javnih dobara;
8. Utvrđivanje i vođenje politike raspolaganja, korištenja i upravljanja građevinskim zemljištem;
9. Utvrđivanje politike upravljanja i raspolaganja imovinom Općine;
10. Utvrđivanje politike upravljanja prirodnim resursima Općine i politike raspodjele sredstava ostvarenih po osnovu njihovog korištenja;
11. Upravljanje, finansiranje i unapređenje djelatnosti i objekata lokalne komunalne infrastrukture i to:
 - Vodosnabdijevanje, odvođenje i prerada otpadnih voda;
 - Prikupljanje i odlaganje čvrstog otpada;
 - Održavanje javne čistoće;

- Gradska groblja;
 - Lokalni putevi i mostovi;
 - Ulična rasvjeta;
 - Javna parkirališta;
 - Parkovi;
12. Organizovanje i unapređenje lokalnog javnog prevoza;
 13. Utvrđivanje politike predškolskog obrazovanja, unaprjeđenje mreže ustanova, te upravljanje i finansiranje javnih ustanova predškolskog obrazovanja;
 14. Osnivanje, upravljanje, finansiranje i unaprjeđenje ustanova osnovnog obrazovanja;
 15. Osnivanje, upravljanje, finansiranje i unaprjeđenje ustanova i izgradnja objekata za zadovoljavanje potreba stanovništva u oblasti kulture i sporta;
 16. Ocjenjivanje rada ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta, te osiguranje finansijskih sredstva za unaprjeđenje njihovog rada i kvaliteta usluga u skladu sa potrebama stanovništva i mogućnostima Općine;
 17. Analiza stanja javnog reda i mira, sigurnosti ljudi i imovine, te predlaganje mjera prema nadležnim organima za ova pitanja;
 18. Organizacija, provođenje i odgovornost za mjere zaštite i spasavanja ljudi i materijalnih dobara od elementarnih nepogoda i prirodnih katastrofa;
 19. Uspostavljanje i vršenje inspeksijskog nadzora nad izvršavanjem propisa iz vlastitih nadležnosti;
 20. Donošenje propisa o porezima, naknadama, doprinosima i taksama iz nadležnosti Općine;
 21. Raspisivanje referendumu za područje Općine;
 22. Raspisivanje javnog zajma i odlučivanje o zaduženju Općine;
 23. Preduzimanje mjera za osiguranje higijene i zdravlja;
 24. Osiguravanje uslova rada lokalnih radio i TV stanica u skladu sa zakonom;
 25. Osiguravanje i vođenje evidencija o ličnim stanjima građana i biračkih spiskova;
 26. Poslove iz oblasti premjera i katastra zemljišta i evidencije o nekretninama;
 27. Organiziranje efikasne lokalne uprave prilagođene lokalnim potrebama, te obavljanje upravnih poslova iz svoje nadležnosti;
 28. Uspostavljanje organizacije mjesne samouprave;
 29. Zaštitu životinja.

Član 11.

Općina pored vlastitih nadležnosti izvršava poslove federalnih i kantonalnih vlasti koje joj te vlasti povjere u skladu sa zakonom, uz obavezno pribavljanje prethodne saglasnosti Općine za prihvatanje obavljanja tih poslova.

Prijenos i povjeravanje Općini poslova iz prethodnog stava mora biti praćeno dodjelom sredstava potrebnih za njihovo efikasno obavljanje.

Član 12.

Općinski organi vlasti, službe za upravu i druge službe, institucije koje vrše javna ovlaštenja i drugi općinski organi primjenjivat će i poštovati prava i slobode predviđene Ustavom, zakonom i ovim Statutom.

IV. – ORGANI OPĆINE

Član 13.

Organi Općine su:
Općinsko vijeće i
Općinski/a načelnik/ca.

Član 14.

Ovlaštenja i obaveze koje proizilaze iz samoupravnog djelokruga Općine podijeljene su između Općinskog vijeća kao predstavničkog organa i Općinskog/e načelnika/ce kao izvršnog organa.

Ako zakonom ili drugim propisom nije jasno određeno koji je organ nadležan za obavljanje poslova iz samoupravnog djelokruga Općine, svi poslovi i zadaci što se odnose na uređivanje odnosa iz samoupravnog djelokruga Općine (normativne naravi) u nadležnosti su Općinskog vijeća, a svi izvršni poslovi i zadaci u nadležnosti su Općinskog/e načelnika/ce.

Ako se radi o izvršnim poslovima, a nije određena nadležnost za njihovo obavljanje, nadležna je Služba koju ovlasti Općinski načelnik.

1. OPĆINSKO VIJEĆE

Član 15.

Općinsko vijeće je predstavnički organ građana i organ lokalne samouprave Općine Konjic, izabran na osnovu općeg biračkog prava na neposrednim izborima tajnim glasanjem, na način određen Zakonom.

Mandat Općinskog vijeća traje četiri godine.

Općinsko vijeće ima 27 članova (vijećnika/ca).

Općinsko vijeće ima predsjednika-cu Općinskog vijeća i zamjenika-cu predsjednika Općinskog vijeća.

Član 16.

Općinsko vijeće u okviru svoje nadležnosti:

- Priprema i dvotrećinskom većinom glasova usvaja Statut Općine;
- Utvrđuje općinsku politiku u okviru nadležnosti Općine i prati njeno ostvarivanje;
- Usvaja budžet, izvještaj o izvršenju budžeta Općine i završni račun;
- Donosi razvojne, prostorne i urbanističke planove i programe, te provedbene planove, uključujući zoniranje;
- Donosi propise o porezima, taksama, naknadama i doprinosima Općine u skladu sa zakonom;
- Donosi odluke o upravljanju i raspolaganju imovinom Općine;
- Donosi odluke o zaduživanju;
- Donosi programe uređenja građevinskog zemljišta;
- Donosi plan korištenja javnih površina;
- Donosi odluke o organizaciji mjesne samouprave i nazivima ulica, trgova i dijelova naseljenih mjesta;
- Donosi odluke o udruživanju jedinica lokalne samouprave u savez i druge oblike organiziranja;
- Donosi odluke o proglašenju praznika Općine;
- Donosi odluke o nagradama i priznanjima Općine.
- Bira i razrješava predsjednika-cu i zamjenika-cu predsjednika Općinskog vijeća;
- Imenuje članove radnih tijela koje osniva Vijeće, kao i druga lica kada je to zakonom i Statutom utvrđeno;
- Odlučuje o pokretanju postupka opoziva Općinskog/e načelnika/ce;
- Donosi odluke o raspisivanju referenduma;
- Donosi program rada Općinskog vijeća i usvaja program rada Općinskog načelnika,
- Razmatra godišnje izvještaje o provođenju općinske politike i aktivnostima načelnika;
- Osniva preduzeća i ustanove za ostvarivanje vlastitih nadležnosti, kao i za obavljanje poslova od interesa za Općinu;
- Ocjenjuje rad ustanova i kvalitet usluga u djelatnosti zdravstva, socijalne zaštite, obrazovanja, kulture i sporta najmanje jednom godišnje, te osigurava finansijska sredstva za unapređenje njihovog rada i kvaliteta usluga, u skladu sa potrebama stanovništva i mogućnostima Općine;
- Analizira stanje javnog reda i mira, sigurnosti ljudi i imovine najmanje jednom godišnje, te predlaže mjere prema nadležnim organima;
- Donosi Poslovnik o svom radu;
- Donosi odluke za čije donošenje je nadležan po zakonu, ovom Statutu ili drugim aktima;
- Obavlja druge poslove utvrđene zakonom i Statutom.

Član 17.

Općinsko vijeće imenuje i razrješava Zdravstveni savjet Općine Konjic.

Zdravstveni savjet broji osam (8) članova od čega:

- predstavnik jedinice lokalne samouprave-1 član
- predstavnik pacijenata-1 član

- predstavnik mladih-1 član
- predstavnik komora iz oblasti zdravstva -1 član
- predstavnik stručnih udruženja -1 član
- predstavnik sindikata -1 član
- predstavnik zdravstvenih ustanova odnosno privatnih praksi - 1 član
- predstavnik Crvenog križa -1 član

Nadležnost Zdravstvenog savjeta utvrđena je članom 14. Zakona o zdravstvenoj zaštiti FBiH.

Član 18.

Organizacija i način rada Općinskog vijeća detaljnije se uređuje Poslovníkom o radu Općinskog vijeća.

Rad Općinskog vijeća je javan.

Izuzetno, Općinsko vijeće može odlučiti da određena pitanja razmatra bez prisustva javnosti.

Član 19.

Općinsko vijeće može početi sa radom ako je na sjednici prisutna većina od ukupnog broja vijećnika/ca.

Općinsko vijeće donosi odluke nadpolovičnom većinom ukupnog broja vijećnika/ca, ukoliko nije drugačije utvrđeno zakonom, ovim Statutom ili Poslovníkom o radu Općinskog vijeća.

Član 20.

Prva sjednica Općinskog vijeća, u novom sazivu, biće održana najkasnije trideset dana nakon objavljivanja rezultata izbora u "Službenom glasniku BiH".

Prvu sjednicu Općinskog vijeća u novom sazivu, saziva predsjednik iz prethodnog saziva Općinskog vijeća i njome predsjedava do izbora novog predsjednika Općinskog vijeća.

Ako predsjednik Općinskog vijeća prethodnog saziva ili njegov/njen zamjenik/ca ne sazove konstitutivnu sjednicu u roku iz prethodnog člana, sjednicu će sazvati najstariji vijećnik/ca novog saziva.

Član 21.

Na prvoj sjednici Općinskog vijeća, većinom glasova ukupnog broja vijećnika (tajnim glasanjem) vrši se izbor predsjednika i zamjenika/ce predsjednika Općinskog vijeća.

Općinski/a načelnik/ca i predsjednik Općinskog vijeća, u slučaju kada je Općinsko vijeće višenacionalnog sastava, ne mogu biti iz reda istog konstitutivnog naroda odnosno iz reda ostalih, izuzev u slučaju kada jedan konstitutivni narod čini više od 80% stanovništva općine Konjic, prema posljednjem popisu stanovništva u Bosni i Hercegovini.

Član 22.

Pravo predlaganja kandidata za predsjedavajućeg/ću Općinskog vijeća ima svaki vijećnik/ca ili grupa vijećnika/ca Općinskog vijeća.

Konačan prijedlog kandidata za izbor na funkciju iz prethodnog stava daje Komisija za izbor, imenovanja.

Izbor predsjednika-ce Općinskog vijeća i zamjenika/ce predsjednika-ce Općinskog vijeća vrši se tajnim glasanjem.

Član 23.

Predsjednik-ca Općinskog vijeća predstavlja Općinsko vijeće i predsjedava sjednicama Općinskog vijeća.

Mandat predsjednika-ce i zamjenika/ce predsjednika-ce Općinskog vijeća traje 4 godine osim u slučaju razrješenja ili smjene.

Predsjednik-ca Općinskog vijeća svoju funkciju može obavljati profesionalno ili volonterski o čemu odluku donosi Općinsko vijeće.

Zamjenik/ca predsjednika-ce Općinskog vijeća svoju funkciju obavlja volonterski.

Član 24.

U vršenju svoje funkcije predsjednik-ca Općinskog vijeća i zamjenik/ca predsjednika-ce Općinskog vijeća imaju ovlaštenja i dužnosti koja proizilaze iz Ustava i Zakona, ovog Statuta i Poslovníka o

radu Općinskog vijeća. Radno-pravni status predsjednika koji obavlja funkciju profesionalno regulisat će se u skladu sa zakonom.

Predsjednik-ca i zamjenik/ca predsjednika ce Općinskog vijeća mogu podnijeti ostavku, odnosno mogu biti opozvani prije isteka mandata, odlukom Općinskog vijeća.

Član 25.

Općinsko vijeće ima sekretara Općinskog vijeća koji je državni službenik.

Član 26.

Općinsko vijeće može, kao stalna ili povremena radna tijela obrazovati komisije, savjete, odbore, radne grupe i druga tijela, čiji se sastav, djelokrug i način rada uređuje Poslovníkom o radu Općinskog vijeća.

Prilikom imenovanja članova stalnih i povremenih radnih tijela Općinsko vijeće će voditi računa da sastav tijela osigura ravnopravnu zastupljenost spolova u skladu sa zakonom.

Član 27.

Članovi radnih tijela Općinskog vijeća imaju pravo na naknadu za svoj rad i druga prava utvrđena odlukom Općinskog vijeća u skladu sa zakonom.

OPĆINSKI VIJEĆNIK/CA

Član 28.

Općinski/a vijećnik/ca (u daljem tekstu: vijećnik) je predstavnik/ca svih građana Općine u Općinskom vijeću, izabran neposrednim i tajnim glasanjem, sa mandatom, pravima i obavezama propisanim ustavom, zakonom i ovim Statutom.

Mandat vijećnika /ce prestaje u slučajevima utvrđenim Izbornim zakonom BiH.

Član 29.

Vijećnik/ca vrši svoje dužnosti u skladu sa zakonom, ovim Statutom i Poslovníkom o radu Općinskog vijeća.

Vijećnik/ca se u javnom životu treba ponašati na primjeren i etičan način, te obavljati svoje dužnosti savjesno i isključivo za dobrobit građana općine.

Vijećnik/ca ima pravo na naknadu (paušal) i druga prava utvrđena zakonom za obavljanje svoje dužnosti.

Član 30.

Ni jedan vijećnik/ca ne smije učestvovati niti savjetodavno, niti u odlučivanju, u stvarima u kojima odluka njima lično ili njegovim / njenim bližnjim može donijeti direktnu korist ili štetu.

Nespojive su dužnosti Općinskog / e načelnika /ce, državnog službenika /ce i ostalih lica određenih zakonom sa dužnosti vijećnika /ce u Općinskom vijeću.

Član 31.

Općinski /e vijećnici /ce su dužni čuvati službenu tajnu o stvarima, koje po njihovoj naravi ili po izričitom zaključku treba tretirati kao povjerljive.

Dužnost čuvanja službene tajne iz prethodnog stava ostaje i nakon prestanka mandata.

Član 32.

U vršenju svoje dužnosti u okviru lokalne samouprave, vijećnik/ca naročito:

- učestvuje u donošenju odluka iz nadležnosti Općinskog vijeća i doprinosi kreiranju i provođenju općinske politike, kroz izvršavanje zakona, drugih propisa i općih akata;
- pokreće rasprave i daje inicijative za razmatranje i rješavanje pitanja iz nadležnosti Vijeća;
- predlaže donošenje odluka iz nadležnosti Općinskog vijeća;
- postavlja vijećnička pitanja o ostvarivanju i zaštiti prava građana u sprovođenju zakona i drugih propisa, te zakonitosti rada i postupanja službi za upravu i drugih službi, odnosno institucija koje imaju javna ovlaštenja;

Član 33.

Vijećnik /ca odgovara za ustavnost i zakonitost akata koje donosi Općinsko vijeće u okviru svojih nadležnosti.

2. OPĆINSKI/A NAČELNIK/CA

Član 34.

Općinski /a načelnik /ca je izvršni organ Općine, koji obavlja funkcije utvrđene Ustavom, zakonom i ovim Statutom.

Općinski /a načelnik /ca se bira direktnim izborom od birača upisanih u Centralni birački spisak u općini Konjic, na način i po postupku utvrđenim zakonom.

Član 35.

Općinski /a načelnik /ca obavlja dužnost za vrijeme mandata na koji je izabran.

Mandat Općinskog /e načelnika /ce traje četiri godine.

Općinski/a načelnik/ca svoju dužnost obavlja profesionalno, a njegovu /njenu visinu plaće utvrđuje Općinsko vijeće, u skladu sa zakonom.

Radno - pravni status Općinskog/e načelnika/ce, regulisan je zakonom.

Općinskom/j načelniku/ci prestaje mandat prije isteka vremena na koji je izabran/na u skladu sa Izbornim zakonom BiH.

Član 36.

Općinski/a načelnik/ca može biti opozvan/a po postupku propisanim zakonom.

Inicijativu za pokretanje postupka opoziva Općinskog/e načelnika/ce sa obrazloženjem može pokrenuti Općinsko vijeće sa glasovima 1/3 vijećnika/ca Općinskog vijeća ili 10 % registriranih birača na području Općine.

Općinsko vijeće je dužno sve inicijative za pokretanje postupka opoziva Općinskog/e načelnika/ce iz stava 2. ovog člana staviti na dnevni red prve naredne sjednice Općinskog vijeća.

U slučaju prihvatanja inicijative, Općinsko vijeće dužno je donijeti odluku o pokretanju postupka opoziva Općinskog/e načelnika/ce u roku od 30 dana.

Odluka o pokretanju opoziva Općinskog/e načelnika/ce donosi se većinom glasova od ukupnog broja vijećnika/ca u Općinskom vijeću.

Ako Općinsko vijeće donese odluku o prihvatanju inicijative za pokretanje postupka opoziva Općinskog/e načelnika/ce, sprovodi se postupak u kojem građani odlučuju direktnim tajnim glasanjem.

Mandat Općinskog/e načelnika/ce prestaje ukoliko natpolovična većina građana koji su glasali donese odluku o opozivu Općinskog/e načelnika/ce.

Odluka građana je obvezujuća za Općinsko vijeće i Općinskog načelnika/ce.

Član 37.

Dužnost Općinskog/e načelnika/ce u slučaju prestanka mandata prije isteka vremena na koje je izabran (u skladu sa odredbom člana 1.10. Izbornog zakona BiH) i u slučaju kad je načelniku prestao mandat zbog provedenog postupka opoziva u skladu sa zakonom, do ponovnog izbora Općinskog/e načelnika/ce vrši osoba izabrana od strane općinskog vijeća nadpolovičnom većinom od ukupnog broja članova Općinskog vijeća.

Član 38.

Općinski /a načelnik /ca, kao izvršni organ Općine, u okviru svoje nadležnosti:

- Predstavlja i zastupa Općinu u skladu sa ustavom, zakonom i Statutom;
- Donosi akte iz svoje nadležnosti;
- Izrađuje i Općinskom vijeću na usvajanje podnosi nacrt i prijedlog budžeta, ekonomske planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta;
- Predlaže odluke i druge opće akte Općinskom vijeću;
- Provodi politiku Općine u skladu sa odlukama Općinskog vijeća, izvršava budžet Općine i osigurava primjenu odluka i drugih akata Općinskog vijeća i podnosi izvještaj o izvršenju budžeta;
- Izvršava zakone i druge propise čije je izvršenje povjereno Općini;
- Utvrđuje organizaciju službi za upravu i drugih službi Općine na način da osigura efikasno i efektivno vršenje poslova iz nadležnosti Općine;

- Donosi pravilnik o unutrašnjoj organizaciji službi Općine kojim osigurava kompetentnu, proaktivnu, odgovornu, otvorenu, efikasnu i efektivnu administraciju;
- Realizira saradnju jedinica lokalne samouprave s drugim općinama, gradovima, međunarodnim i drugim organizacijama u skladu sa odlukama i zaključcima Općinskog vijeća i njegovih radnih tijela;
- Podnosi izvještaj Općinskom vijeću o ostvarivanju politike Općine, i svojim aktivnostima;
- Obavlja i druge poslove utvrđene zakonom, drugim propisima, ovim statutom i aktima Općinskog vijeća.

Član 39.

Općinskog /u načelnika /cu za vrijeme privremene odsutnosti ili spriječenosti zamjenjuje dužnosnik ili službenik organa uprave kojeg on ovlasti.

Član 40.

Načelnik /ca je odgovoran /na za ustavnost i zakonitost akata koje donosi, odnosno predlaže Općinskom vijeću.

ORGANIZACIJA OPĆINSKE UPRAVE

Član 41.

Poslove lokalne samouprave i uprave iz djelokruga Općine, obavljaju se u okviru Jedinstvenog općinskog organa uprave na način utvrđen zakonom ili drugim propisima.

Član 42.

U okviru jedinstvenog općinskog organa uprave formiraju se službe za upravu.

Općinske službe za upravu, u okviru prava i dužnosti Općine, izvršavaju zakone i druge propise, odluke i druge opće akte Općinskog vijeća, općinskog načelnika, prate stanje u upravnim oblastima za koje su osnovane, rješavaju u upravnim stvarima, provode nadzor, preduzimaju mjere za koje su zakonom ili drugim propisom ovlaštene, pripremaju odluke i opće akte, te obavljaju druge poslove iz okvira svoje nadležnosti.

Član 43.

Općinski /a načelnik /ca je odgovoran /na za uredno obavljanje poslova općinske uprave kojom rukovodi, nadređen /a je svim službenicima / ama koje postavlja.

Odlukom o organizaciji i djelokrugu rada Jedinstvenog općinskog organa uprave uređuje se broj, naziv, djelokrug poslova općinskih službi, način rukovođenja i kordinacije te druga pitanja važna za organizaciju i djelokrug rada organa, a unutrašnja organizacija i sistematozacija radnih mjesta uređuje se Pravilnikom o unutrašnjoj organizaciji Jedinstvenog općinskog organa uprave.

Radnopravni status državnih službenika koji obavljaju poslove osnovne djelatnosti i namještenika koji obavljaju administrativno-tehničke i poslove pomoćne djelatnosti regulisan je zakonom.

Član 44.

Općinski /a načelnik/ca uređuje općinsku upravu i rukovodi organizacionim jedinicama (službama) što je moguće ekonomičnije i djelotvornije, nadzire uredno obavljanje upravnih poslova .

Općinski načelnik/ca putem općinskih službi prati rad, daje preporuke i preduzima mjere prema pravnim licima čiji je osnivač Općinsko vijeće.

Radom službe upravlja pomoćnik /ca općinskog /e načelnika /ce.

Pomoćnici načelnika čine Savjet načelnika.

Djelokrug i način Savjeta načelnika uređuje se posebnim propisom koga donosi načelnik općine u skladu sa zakonom i statutom općine.

Član 45.

Općinski /a načelnik /ca može obrazovati ured Općinskog /e načelnika /ce radi koordinacije pripremnih i izvršnih poslova općinske uprave i lokalne samouprave i koji pomaže Općinskom /oj načelniku /ci.

Uredom Općinskog /e načelnika /ce rukovodi sekretar općine koga imenuje Općinski /a načelnik /ca i koji je državni službenik /ca.

Sekretar učestvuje u svim važnijim upravnim poslovima.

Pojedinosti o radu ureda uređuju se Uputstvom Općinskog /e načelnika /ce.

Član 46.

Sastav svih tijela i službi općine treba odražavati nacionalnu strukturu stanovništva Općine.

V – MEĐUSOBNI ODNOSI OPĆINSKOG VIJEĆA I OPĆINSKOG/E NAČELNIKA/CE

Član 47.

Međusobni odnosi Općinskog vijeća i Općinskog/e načelnika/ce zasnivaju se na ustavu, zakonu i ovom Statutu, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje i razvoj Općine.

Član 48.

U roku od tri mjeseca od konstituirajuće (prve) sjednice Općinskog vijeća, Općinski/a načelnik/ca dostavlja Općinskom vijeću prijedlog koji sadrži osnove programa i politike koje treba ostvariti u toku mandata.

U roku od narednih 30 dana Općinsko vijeće razmatra program iz prethodnog stava ovog člana.

Član 49.

Općinsko vijeće vrši provjeru provođenja programa svake godine, najkasnije u mjesecu martu za prethodnu kalendarsku godinu.

Član 50.

Općinsko vijeće, odnosno Općinski/a načelnik/ca može u roku od tri dana nakon donošenja odluke zatražiti da Općinsko vijeće, odnosno Općinski/a načelnik/ca preispita odluku ili akt koji smatra neustavnim ili nezakonitim.

U slučaju iz prethodnog stava nadležni organ dužan je preispitati svoju odluku, odnosno akt u roku od 30 dana i obavijestiti Općinsko vijeće, odnosno Općinskog/u načelnika/cu o svojoj odluci, do kada se taj akt neće izvršiti.

Kada Općinsko vijeće, odnosno Općinski/a načelnik/ca potvrdi svoju odluku, odnosno akt, Općinsko vijeće, odnosno Općinski/a načelnik/ca može u roku od 15 dana pokrenuti postupak preispitivanja odluke, odnosno akta pred nadležnim organom u skladu sa ustavom i zakonom.

Član 51.

Općinsko vijeće, odnosno Općinski/a načelnik/ca može u roku od tri dana nakon donošenja odluke zatražiti da Vijeće, odnosno Općinski/a načelnik/ca preispita odluku, ili akt koji smatra štetnim po Općinu, a čije izvršenje može proizvesti nepopravljivu štetu po interese ili imovinu Općine.

Organ koji je donio odluku preispitat će je najkasnije u roku od 15 dana, do kada se ona ne primjenjuje.

Član 52.

Općinski/a načelnik/ca je dužan/na redovno informirati Općinsko vijeće o ostvarivanju općinske politike, te odgovarati na vijećnička pitanja i inicijative, najkasnije u roku od 30 dana, što će se pobliže urediti Poslovníkom o radu Općinskog vijeća.

Član 53.

Općinsko vijeće je dužno da razmotri prijedlog akta odnosno informaciju koji podnese Općinski/a načelnik/ca i da se o istom izjasni najkasnije u roku od 30 dana.

VI – MJESNA SAMOUPRAVA

Član 54.

Mjesna samouprava u Općini ostvaruje se u mjesnoj zajednici, te mjesnim područjima.

Mjesno područje je teritorijalno određen dio mjesne zajednice, koji čini dio naselja ili jedno naselje ili više međusobno povezanih naselja.

Član 55.

Mjesnu zajednicu, kao obavezni oblik mjesne samouprave osniva Općinsko vijeće. Odlukom o osnivanju mjesne zajednice utvrđuje se: naziv, sjedište, područje mjesne zajednice, mjesna područja, odnosno drugi dijelovi mjesne zajednice, kao i druga pitanja u vezi sa ostvarivanjem mjesne samouprave i radom Mjesne zajednice.

Član 56.

Mjesna zajednica ima svojstvo pravnog lica u okviru prava i dužnosti utvrđenih Statutom i Odlukom o organizaciji i osnivanju mjesnih zajednica na području Općine Konjic.

Član 57.

Statutom mjesne zajednice, u skladu sa ovim Statutom i odlukom o osnivanju mjesne zajednice utvrđuju se poslovi koje vrši mjesna zajednica, organi i postupak izbora, organizacija i rad organa, način odlučivanja i druga pitanja od značaja za rad mjesne zajednice. Statut mjesne zajednice donosi zbor građana mjesne zajednice.

Član 58.

Mjesna zajednica može biti osnovana za jedno naseljeno mjesto, više međusobno povezanih manje naseljenih mjesta, ili za veći dio naselja koji u odnosu na ostale dijelove naselja čini cjelinu. Inicijativu za osnivanje mjesne zajednice mogu pokrenuti građani, udruženja građana sa područja naseljenog mjesta za čije se područje predlaže osnivanje mjesne zajednice, Općinsko vijeće ili Općinski načelnik.

Član 59.

Građani u mjesnoj zajednici kroz organe mjesne zajednice odlučuju o poslovima značajnim za život i rad na području mjesne zajednice, a naročito:

- pokreću i učestvuju u javnoj raspravi kod pripreme i donošenja urbanističkih planova na području mjesne zajednice, pokreću inicijative, daju mišljenja i učestvuju u izgradnji komunalnih objekata i objekata u općoj upotrebi;
- pokreću i učestvuju u raspravama o inicijativama i aktivnostima za razvoj privrede i društvenih djelatnosti;
- brinu o zaštiti osoba kojima je potrebna pomoć i u tu svrhu pokreću saradnju sa stručnim organima u oblasti socijalne zaštite;
- staraju se o razvoju kulture i sporta i stvaraju uslove za dostupnost ustanova i objekata kulture i sporta svim građanima, a pogotovo mladim;
- stvaraju uslove i preduzimaju mjere za očuvanje i zaštitu prirodnih i radom ostvarenih vrijednosti čovjekove sredine;
- drugim poslovima utvrđenim statutom mjesnih zajednica vodeći računa o vrsti i obimu potreba, raspoloživim sredstvima, kao i interesima građana u cjelini.

Član 60.

Općina može, uz obezbjeđenje finansijskih sredstava, prenijeti na mjesnu zajednicu izvršavanje određenih poslova iz svoje nadležnosti, a naročito izgradnju, održavanje i upravljanje objektima za potrebe obrazovanja, sporta, kulture, kao i drugih sadržaja. Odluku o prenosu poslova iz prethodnog stava donosi Općinsko vijeće.

Član 61.

Ukoliko je u mjesnoj zajednici organizovano izvršavanje određenih decentraliziranih poslova, za čije obavljanje neposredno nije nadležna Općina, predstavnici organa mjesne zajednice i predstavnici decentralizovanih poslova obavezni su ostvarivati koordinaciju i suradnju u cilju podizanja nivoa saradnje i kvaliteta usluga.

Član 62.

Prava i dužnosti mjesnih zajednica, utvrđena zakonom i ovim Statutom, ne mogu biti uskraćena ili ograničena od općinske ili druge vlasti.

Član 63.

Organi mjesne zajednice su:

- Savjet mjesne zajednice i
- Zbor građana mjesne zajednice.

Član 64.

Savjet Mjesne zajednice je organ odlučivanja i konsultovanja o pitanjima od neposrednog interesa građana mjesne zajednice, koja su utvrđena zakonom, ovim Statutom i Statutom mjesne zajednice.

Član 65.

Organi mjesne zajednice donose programe i planove rada, koji moraju biti usklađeni sa politikom i programima i planovima koje donosi Općinsko vijeće.

Član 66.

Organi mjesne zajednice odlučuju o poslovima koji se financiraju iz sredstava koja se neposredno prikupljaju od građana ili na drugi način i prenesenim poslovima.

Član 67.

Prije donošenja odluke iz svoje nadležnosti, Savjet mjesne zajednice je dužan konsultovati zbor građana mjesne zajednice.

Član 68.

Savjet mjesne zajednice će biti obavezno konsultovan o pitanjima o kojima Općinsko vijeće odlučuje dvotrećinskom većinom i u postupku donošenja budžeta i planova Općine.

Konsultovanje iz prethodnog stava vrši se u fazi priprema i u postupku donošenja odluka, na način utvrđen Statutom mjesne zajednice.

Savjet mjesne zajednice je obavezan dati mišljenje i o drugim pitanjima o kojima je zatražena konsultacija od Općinskog vijeća ili Općinskog /e načelnika /ce.

O ostalim pitanjima Savjet mjesne zajednice će biti konsultovan na način i pod uslovima utvrđenim Statutom mjesne zajednice.

Član 69.

Član Savjeta mjesne zajednice je predstavnik građana mjesnog područja izabran neposrednim, tajnim glasanjem, sa mandatom, pravima i obavezama propisanim ovim Statutom i Statutom mjesne zajednice.

Za člana Savjeta mjesne zajednice može biti izabran građanin, upisan u birački spisak Općine (u daljem tekstu: birački spisak), sa prebivalištem na području mjesne zajednice.

Strani državljanin sa boravištem na području mjesne zajednice najmanje godinu dana prije održavanja izbora, može biti počasni član Savjeta mjesne zajednice, o čemu odlučuje Savjet mjesne zajednice.

Izbori za članove Savjeta mjesne zajednice održavaju se u svim mjesnim zajednicama i to najkasnije šest mjeseci nakon izbora za Općinsko vijeće.

Mandat članova Savjeta mjesne zajednice traje četiri godine.

Član 70.

Prva sjednica Savjeta mjesne zajednice biće održana u roku od trideset dana od dana objavljivanja rezultata lokalnih izbora.

Sjednica može biti održana uz prisustvo najmanje dvije trećine izabranih članova.

Savjet mjesne zajednice donosi odluke većinom glasova ukupnog broja članova.

Kandidat sa liste za izbor članova savjeta MZ sa najvećim brojem osvojenih glasova je predsjednik Mjesne zajednice i po funkciji Predsjednik Savjeta MZ. Savjet mjesne zajednice iz svog sastava bira većinom glasova svih članova zamjenika predsjednika Savjeta MZ.

Član 71.

Zbor građana mjesne zajednice je organ konsultovanja o lokalnim poslovima.

Zbor građana se konsultuje o pitanjima o kojima odlučuje savjet mjesne zajednice, kao i o pitanjima o kojima odlučuje Općinsko vijeće dvotrećinskom (2/3) većinom, te u postupku donošenja budžeta i planova općine, naročito u dijelu koji se odnosi na područje mjesne zajednice.

Zbor građana može davati inicijative o pitanjima iz nadležnosti mjesne zajednice Općini i institucijama koje vrše javne ovlasti.

Inicijativa zbora građana mjesne zajednice, koju je podržalo najmanje 10% građana mjesne zajednice, obavezuje savjet mjesne zajednice, a organe općinske vlasti da se o njoj izjasne. Savjet mjesne zajednice saziva zbor građana mjesne zajednice po potrebi, a obavezno na zahtjev Općinskog vijeća, Općinskog/e načelnika/ce, kao i na inicijativu od najmanje 5% građana mjesnog područja za koje se održava zbor.

Član 72.

Zbor građana se održava jedinstveno za mjesnu zajednicu ili po dijelovima za mjesno područje. Odluku o načinu održavanja zbora građana donosi savjet mjesne zajednice u skladu sa Statutom mjesne zajednice.

Član 73.

Nadzor nad zakonitošću rada organa mjesne zajednice vrši Općinsko vijeće, putem službe zavisno od pitanja nadzora.

Općinski načelnik ima pravo i obavezu predložiti Općinskom vijeću da raspusti Savjet mjesne zajednice, odnosno da razriješi od dužnosti predsjedavajućeg/ću savjeta MZ, ako se utvrdi da u svom radu krši Statut mjesne zajednice, ovaj Statut ili propise Općine ili ne izvršava povjerene im poslove.

Na prijedlog Komisije za statutarna pitanja i propise Općinsko vijeće može obustaviti od izvršenja odluku mjesne zajednice.

Član 74.

Sredstva za rad mjesne zajednice su:

- mjesna zajednica imat će prihode srazmjerne ovlaštenjima predviđenim zakonom i statutom;
- sistem finansiranja mjesnih zajednica mora biti dovoljno raznovrstan i evolutan da bi mogao slijediti, koliko je praktički moguće, promjene stvarnih troškova obavljanja poslova iz ovlaštenja mjesne zajednice;
- sredstva osigurana iz sredstava samodoprinosna;
- sredstva za usluge koja svojim aktivnostima ostvaruje mjesna zajednica;
- pokloni i druga sredstva,

Mjesna zajednica koristi sredstva u skladu sa svojim programima i planovima.

Član 75.

Stručne i administrativno-tehničke poslove za potrebe organa mjesne zajednice, vrši općinska služba nadležna za odnose sa mjesnim zajednicama.

VII NEPOSREDNO UČESTVOVANJE GRAĐANA U ODLUČIVANJU I IZJAŠNJAVANJE GRAĐANA O PITANJIMA IZ SAMOUPRAVNOG DJELOKRUGA OPĆINE

Član 76.

Građani na teritoriji općine, mogu neposredno da učestvuju u odlučivanju o lokalnim poslovima iz samoupravnog djelokruga općine:

- referendumom,
- zbor građana mjesne zajednice,
- građanskom inicijativom,
- drugim oblicima.

REFERENDUM

Član 77.

Općinsko vijeće raspisuje referendum radi odlučivanja o prijedlogu za udruživanje općine sa drugim općinama, o prijedlogu za promjenu granica općine, kao i o drugim pitanjima za koje odluku o raspisivanju referenduma donese Općinsko vijeće dvotrećinskom većinom glasova.

Pravo na odlučivanje na referendumu imaju građani koji imaju prebivalište na području općine i koji su upisani u birački spisak.

Odluka donesena na referendumu obavezna je za Općinsko vijeće.

Član 78.

Prijedlog za raspisivanje referenduma mogu podnijeti:

- 1/3 vijećnika/ca Općinskog vijeća,
- Općinski/a načelnik/ca,
- 1/3 mjesnih zajednica, na osnovu odluka koju donose zborovi mjesnih zajednica,
- 10% registrovanih birača.

Član 79.

Odlukom o raspisivanju referenduma određuju se pitanja o kojima građani treba da se izjasne na referendumu, područje na kojem treba provesti referendum kao i bliže uređivanje postupka za održavanje referenduma.

Referendum provodi komisija za provođenje referenduma koju imenuje Općinsko vijeće i odbor za sprovođenje glasanja na glasačkom mjestu kojeg imenuje komisija za sprovođenje referenduma.

Komisija za sprovođenje referenduma određuje glasačka mjesta na području na kojem će se građani izjašnjavati na referendumu.

Član 80.

Na referendumu se građani tajnim glasanjem izjašnjavaju "ZA" ili "PROTIV" prijedloga o kojem se glasa.

Ako građani na referendumu odbiju određeni prijedlog, to se pitanje može staviti na referendum nakon isteka godine dana od sprovedenog referenduma.

ZBOR GRAĐANA MJESNE ZAJEDNICE

Član 81.

Zbor građana mjesne zajednice saziva se radi izjašnjavanja građana o pojedinim pitanjima iz samoupravnog djelokruga općine, raspravljanja o potrebama i interesima građana, te davanja prijedloga za rješavanje pitanja od mjesnog značaja kao što su:

- izgradnja i održavanje puteva, kanalizacije, vodovoda i drugih komunalnih potreba i infrastrukture;
- uređenje naselja, izgradnju i uređenje parkova, nasada, dječijih igrališta, sportskih i drugih objekata;
- zaštita čovjekove okoline i slično.

Član 82.

Zbor građana saziva predsjednik mjesne zajednice, a može ga sazvati i Općinski/a načelnik/ca i Općinsko vijeće, kada to ocijene važnim.

Mjesni zbor građana saziva se za dio područja mjesne zajednice koji čini zasebnu cjelinu (dio naselja, stambeni blok ili više manjih naselja).

Zbor građana saziva se javnim upućivanjem poziva.

Poziv za zbor mora biti javno objavljen na uobičajen način i prikladan mjesnim prilikama, na cijelom području za koje se zbor održava najmanje 8 dana, a u izuzetno hitnim slučajevima 3 dana prije održavanja zbora.

U pozivu se mora naznačiti prijedlog dnevnog reda, mjesto i vrijeme održavanja zbora.

Organi mjesne zajednice dužni su organizirati i osigurati održavanje zbora građana.

O održavanju zbora građana brine se predsjednik mjesne zajednice, odnosno njegov zamjenik.

Zbor građana vodi predsjednik mjesne zajednice ili njegov zamjenik.

Član 83.

Na zboru građana imaju pravo sudjelovati građani koji imaju prebivalište na području za koje je sazvan zbor građana.

Zbor građana donosi zaključke većinom glasova prisutnih, pod uslovom da zboru prisustvuje jedna desetina (1/10) birača.

Zaključci doneseni na zboru građana obavezujući su za Savjet mjesne zajednice. Mišljenja i prijedloge iznesene na zboru građana Općinsko vijeće i Općinski/a načelnik/ca dužni su razmatrati u toku rasprave o pitanju na koje se ta mišljenja i prijedlozi odnose.

GRADANSKA INICIJATIVA

Član 84.

Građani mogu Općinskom vijeću uputiti inicijativu za donošenje propisa i drugih akata iz nadležnosti Općinskog vijeća, u cilju rješavanja određenog pitanja.

Ukoliko su za realizaciju građanske inicijative potrebna sredstva, inicijativa mora sadržavati prijedlog načina njihovog obezbjeđivanja.

Općinsko vijeće je dužno razmotriti građansku inicijativu koju je svojim potpisom podržalo najmanje 3% birača upisanih u birački spisak, što prije a najkasnije u roku od 60 dana.

DRUGI OBLICI UČESTVOVANJA GRAĐANA U ODLUČIVANJU I IZJAŠNJAVANJU O PITANJIMA IZ SAMOUPRAVNOG DJELOKRUGA OPĆINE SLOBODNI OBLICI UDRUŽIVANJA

Član 85.

Općina afirmiše društvene inicijative i aktivnosti na polju razvoja civilnog društva, socijalne brige, očuvanja okoline, kulturne i umjetničke baštine preko organizacija i udruženja građana, čiji su ciljevi humanitarnog, obrazovnog, naučnog, sportskog, rekreativnog, kulturnog i vjerskog karaktera.

Općina pridaje važnost konsultacijama sa stručnjacima i naučnim radnicima, kao i sa stranim državljanima sa boravištem na njenoj teritoriji i afirmiše njihovo aktivno učestvovanje u izgradnji ekonomskog, kulturnog i socijalnog života građana općine i afirmisanju općine i njenog razvoja u cjelini.

Dajući značaj navedenim oblicima udruživanja građana, Općina obezbjeđuje:

- informacije i pristup administrativnim procedurama;
- pristup strukturama i općinskim uslugama;
- prezentiranje projekata ili dokumentovanje drugih planova i aktivnosti;
- prezentiranje Općinskom/j načelniku/ci i Općinskom vijeću prijedloga, primjedbi i sugestija.

PREDSTAVKE, PRIGOVORI I PRITUŽBE

Član 86.

Građani i pravna lica imaju pravo Općinskom vijeću i Općinskom/j načelniku/ci podnositi prigovore i pritužbe.

Organi iz prethodnog stava dužni su omogućiti građanima i pravnim licima podnošenje prigovora i pritužbi na svoj rad te na odnos zaposlenih u tim organima kada im se obraćaju radi ostvarivanja svojih prava i interesa ili izvršavanja građanskih dužnosti.

Prigovor i pritužba moraju biti potpisane i na njima navedena imena i prezimena te adresa građana koji ih podnose, odnosno naziv i sjedište pravnog subjekta.

Na podnesene prigovore i pritužbe organi iz stava 1. ovog člana dužni su građanima i pravnim subjektima dati odgovor u roku od 30 dana od dana podnošenja prigovora odnosno pritužbe.

Organi iz stava 1. su dužni u službenim prostorijama na vidnom mjestu osigurati potrebna tehnička i druga sredstva za podnošenje predstavki, prigovora, pritužbi te omogućiti usmeno davanje istih.

ORGANI PARTICIPACIJE

Član 87.

Općina podstiče osnivanje različitih oblika i organa participacije i afirmiše vođenje općinskih usluga na osnovu zahtjeva korisnika usluga, te afirmiše formiranje udruženja korisnika usluga, osiguravajući im neophodnu podršku.

Općina afirmiše osnivanje organa participacije koji predstavljaju djecu i mlade, s ciljem da promovira njihovo aktivno učestvovanje u izgradnji civilnog društva.

Jednom godišnje organi participacije su dužni pismenim putem izvještavati organe općine i mjesne zajednice o svojim aktivnostima.

Općina afirmiše aktivno učestvovanje međunarodnih organizacija, nevladinih organizacija stranih država i stranih državljana u definiranju programa i aktivnosti organa općine.

Predstavnici iz prethodnog stava mogu aktivno učestvovati i davati prijedloge, sugestije, mišljenja na materijale koji se razmatraju na sjednici Općinskog vijeća.

SAVJETOVANJE

Član 88.

Općina, sa ciljem da poboljša aktivno i efikasno učestvovanje građana u odlučivanju i transparentnost administrativnih poslova, promovira razne oblike savjetovanja putem:

- mjesnog zbora građana;
- organizacija korisnika javnih usluga;
- javnog poziva građanima da prezentiraju prijedloge i zapažanja u odnosu na mjere i rad organa vlasti;
- ankete javnog mnijenja;
- javnog informisanja.

KONSULTATIVNI SASTANCI

Član 89.

Putem konsultativnih sastanaka Općina prije donošenja odluka promovira razne oblike savjetovanja sa asocijacijama i udruženjima građana, građanima, stručnjacima i naučnim radnicima koji mogu doprinijeti kvalitetnoj pripremi prijedloga odluka u interesu građana i općine u cjelini.

JAVNA RASPRAVA

Član 90.

Općinsko vijeće putem javne rasprave omogućava građanima da učestvuju u donošenju propisa iz nadležnosti Općine, u skladu sa Zakonom, Poslovníkom Općinskog vijeća i ovim Statutom.

Poslovníkom Općinskog vijeća detaljnije će se regulisati obaveze predlagača i način vođenja javne rasprave.

SATI GRAĐANA

Član 91.

Općinski/a načelnik/ca i predsjedavajući/a Općinskog vijeća mogu odrediti jedan dan u mjesecu u kojem će dio radnog vremena posvetiti neposrednom susretu i razgovoru sa građanima.

Detaljnije odredbe o načinu i terminima organiziranja susreta određuju se posebnim aktom.

VIII – FINANSIRANJE I IMOVINA OPĆINE

Član 92.

Općina ima pravo slobodnog i samostalnog raspolaganja svojom imovinom u skladu sa zakonom. Općina samostalno raspolaže finansijskim sredstvima u skladu sa zakonom.

Finansijskim sredstvima i imovinom općine mora se upravljati u skladu sa zakonom i drugim propisima u interesu stanovnika općine.

Član 93.

Finansiranje općine vrši se iz poreza, taksu, prihoda od pokretnih i nepokretnih stvari, koncesija, dotacija, naknada, zaduživanja kod banaka i drugih finansijskih organizacija, donacija i drugih prihoda utvrđenih zakonom i dugim propisima.

Općina ima pravo i dužnost osigurati dodatna sredstva kroz sistem aktivne ekonomske politike.

Član 94.

Općini pripadaju prihodi, u skladu sa zakonom, i to:

a) Vlastiti prihodi:

- porez na imovinu, porez od poljoprivredne djelatosti, porez na promet nekretnina kao i drugi porezi u skladu sa zakonom, za koje Općina samostalno određuje stopu;

- komunalne takse, druge takse i naknade čije iznose utvrđuje Općinsko vijeće u skladu sa zakonom;
- kazne naplaćene po općinskim propisima;
- kamate;
- prihodi ostvareni upravljanjem i prodajom imovine općine;
- prihodi od preduzeća i drugih pravnih lica u vlasništvu općine;
- prihodu od sredstava hidroakumulacije,
- prihodi od koncesija u skladu sa zakonom;
- darovi, nasljedstva, pomoći i donacije;
- prihodi od samodoprinosi;
- prihodi od budžetskih korisnika;
- prihodi ostvareni kupovinom i prodajom dionica u svom vlasništvu;
- drugi prihodi utvrđeni zakonom i odlukom Općinskog vijeća.

b) drugi prihodi

- prihodi od dijeljenih poreza u skladu sa zakonom;
- transferi i grantovi od viših nivoa vlasti;
- udružena sredstva;
- dug u skladu sa zakonom.

Ostvarenim prihodima Općina samostalno raspolaže kroz budžet koji donosi Općinsko vijeće u skladu sa zakonom i drugim propisima.

Član 95.

Općina može radi zadovoljavanja potreba građana prikupljati sredstva na osnovu neposrednog izjašnjavanja građana u skladu sa zakonom, odnosno ovim Statutom.

Odluku o pokretanju postupka prikupljanja sredstava na način utvrđen prethodnim stavom, donosi Općinsko vijeće na prijedlog:

- jedne trećine vijećnika/ca Općinskog vijeća;
- Općinskog/e načelnika/ce;
- jedne trećine mjesnih zajednica na osnovu odluka zborova građana..

Član 96.

Imovinu općine čine stvari, prava i novčana sredstva.

Imovinom Općine upravlja i raspolaže Općinsko vijeće na način i pod uslovima propisanim zakonom, propisima donesenim na osnovu zakona i ovim Statutom.

Član 97.

Svako ima pravo služiti se javnim dobrima u općoj upotrebi prema namjeni određenoj zakonom, odlukom Općine ili kako odredi pravna osoba kojoj je data na upravljanje i koja njima neposredno upravlja.

Član 98.

Općina se može zaduživati, davati jamstva i garancije u skladu sa zakonom.

IX– BUDŽET OPĆINE KONJIC

Član 99.

Prihodi i rashodi Općine utvrđuju se u budžetu Općine.

Prihodi i rashodi budžeta moraju biti uravnoteženi.

Član 100.

Načelnik je dužan dostaviti prijedlog budžeta Općinskom vijeću u roku propisanom budžetskim kalendarom.

Općinsko vijeće, većinom ukupnog broja vijećnika/ca, usvaja budžet u roku predviđenom budžetskim kalendarom.

Izrada i donošenje budžeta vrši se u skladu sa Zakonom o budžetima u Federaciji BiH i po proceduri utvrđenoj Budžetskim kalendarom.

O budžetu se provodi javna rasprava.

Član 101.

Do usvajanja novog budžeta, najduže 90 dana nakon početka budžetske godine, finansiranje Općine ne može biti veće od realizacije budžeta za isti period prethodne godine umanjenog za kapitalne investicije, izuzev onih kapitalnih investicija čija se realizacija nastavlja u tekućoj godini.

Član 102.

Ukoliko Općinsko vijeće ne donese budžet u roku od 90 dana od početka budžetske godine, Općinski/a načelnik/ca proglašava budžet.

Budžet stupa na snagu nakon objavljivanja u «Službenom glasniku Općine Konjic».

Član 103.

Ukoliko Općinski/a načelnik/ca ili Općinsko vijeće ili jedna trećina vijećnika/ca smatraju da usvojeni budžet u određenoj poziciji može ugroziti funkcionisanje Općine, mogu u roku od sedam dana da traže arbitražu, od nadležnog tijela Federalnog ministarstva finansija, čiji nalaz je obavezujući.

Do donošenja arbitražne odluke budžet se izvršava.

X – PROPISI I DRUGI AKTI OPĆINE

Član 104.

Općinsko vijeće donosi propise i druge akte, preporuke, smjernice, deklaracije, rezolucije, zaključke, te pojedinačne akte, u skladu sa ustavom, zakonom i ovim Statutom.

Općinsko vijeće donosi sljedeće propise: statut, budžet, planske akte, odluke, rješenja, zaključke i druge propise utvrđene Poslovnikom o radu Općinskog vijeća.

Poslovnikom o radu Općinskog vijeća utvrđuje se način i postupak donošenja propisa i akata Općinskog vijeća.

Član 105.

Općinski/a načelnik/ca, u izvršavanju zakona, propisa i općih akata iz samoupravnog djelokruga Općine, donosi odluke, rješenja, pravilnike i druge akte za čije je donošenje ovlašten/a zakonom, drugim propisom, ovim Statutom ili odlukom Općinskog vijeća.

Član 106.

Odluke i drugi opći akti Općinskog vijeća po pravili moraju se objaviti u «Službenom glasniku općine Konjic», prije nego stupe na snagu.

Član 107.

Protiv pojedinačnih upravnih akata, radnji i mjera Općinskog/e načelnika/ce i službi donesenih u prvom stepenu, koje se odnose na pitanja koja po Ustavu i Zakonu čine isključivo samoupravni djelokrug općine može se izjaviti žalba Žalbenom vijeću Općinskog vijeća.

Žalbeno vijeće iz prethodnog stava osniva se posebnom odlukom Općinskog vijeća, kojom se naročito utvrđuje naziv tijela, nadležnost, broj i sastav članova, način imenovanja članova, pečat i sjedište, način i postupak odlučivanja i druga pitanja od značaja za uređenje i rad Žalbenog vijeća .

XI – DONOŠENJE I IZMJENE STATUTA OPĆINE

Član 108.

Postupak za donošenje Statuta pokreće se donošenjem Odluke o izmjeni Statuta i obuhvata: utvrđivanje i razmatranje nacрта, javnu raspravu, utvrđivanje prijedloga i usvajanje Statuta.

Član 109.

Prijedlog za pokretanje postupka za izmjene Statuta može podnijeti jedna trećina vijećnika/ca Općinskog vijeća, Općinski/a načelnik/ca i Komisija za statutarna pitanja i propise.

Prijedlog iz stava 1. ovog člana mora biti obrazložen, a podnosi se predsjedniku/ci Općinskog vijeća u pismenoj formi.

Prijedlog za izmjenu Statuta predsjednik/ca Općinskog vijeća upućuje Komisiji za statutarna pitanja i propise, koja je razmatra i uz mišljenje upućuje Općinskom vijeću.

Inicijativu za izmjenu Statuta Općine, mogu dati građani, putem mjesnih zajednica.

Promjene Statuta vrši se odlukom Općinskog vijeća.

XII - JAVNOST I TRANSPARENTNOST

Član 110.

Općina osigurava javnost rada u postupku donošenja odluka, uključivanjem javnosti, odnosno omogućavanjem građanima da neposredno učestvuju u postupku donošenja odluka i odlučivanju, u skladu sa zakonom i ovim Statutom, te da prisustvuju sjednicama Općinskog vijeća u skladu sa Poslovníkom Općinskog vijeća.

Član 111.

Transparentnost rada općina ostvaruje kroz otvorenost postupka realizacije općinskih propisa i akata, primjenu zakona i drugih propisa, te kroz upoznavanje javnosti sa njihovom primjenom.

Transparentnost se obezbjeđuje kroz slobodu pristupa informacijama i informisanje javnosti, objavljivanje izvještaja, budžeta i drugih sadržaja, putem sredstava javnog informisanja, vlastitog informacionog sistema, Web stranice Općine i druge oblike informisanja.

Općina će javnosti podnositi godišnji izvještaj u kojem će se uporediti postignuti rezultati sa planiranim programskim ciljevima.

Član 112.

Općina će objaviti i na drugi način učiniti javno dostupnim svoje propise i akte.

Općina neće objaviti ili na drugi način učiniti javno dostupnim propise i akte čije bi objavljivanje bilo u suprotnosti sa zakonom, drugim propisima i aktima Općinskog vijeća, kao ni informacije koje uključuju lične interese koji se odnose na privatnost trećeg lica, osim ako je to opravdano javnim interesom.

XIII ZAŠTITA PRAVA NA LOKALNU SAMOUPRAVU

Član 113.

Radi ostvarivanja ustavom, zakonom i statutom utvrđenih prava osigurava se zaštita prava građana na lokalnu samoupravu, a posebno:

- da građani putem referendumu i drugih oblika odlučivanja ličnim izjašnjavanjem ili preko slobodno izabranih vijećnika/ca odlučuju o poslovima lokalnog značaja,
- prava građana na samoorganiziranje,
- pravo građana da budu konsultovani o svim pitanjima kad se zakonom uređuju pitanja kojima se uređuju prava i obaveze općina,
- da građani na zborovima građana razmatraju i daju mišljenja u slučajevima kada Kanton prenosi pojedine poslove općini iz okvira svoje nadležnosti.

Član 114.

Zaštita prava građana na lokalnu samoupravu obuhvata naročito:

- obavezu pravnih lica da poštuju, sprovode i ne krše odluke donijete referendumom građana i zakonite odluke Općinskog vijeća,
- obavezu Općinskog vijeća da blagovremeno odgovore na zaključke zbora građana i građansku inicijativu,
- obaveza poslodavaca da sprovode odluku o samodoprinosu.

Član 115.

Građani i organi općine mogu dati inicijativu nadležnim kantonalnim organima da podnesu zahtjev Ustavnom sudu Federacije Bosne i Hercegovine za utvrđivanje ustavnosti i zakonitosti propisa, koji donosi organ kantonalne vlasti ili vlasti općine, ako smatraju da se tim propisom povređuju prava građana na lokalnu samoupravu.

XIV – ODNOSI I SARADNJA SA FEDERALNIM I KANTONALNIM VLASTIMA

Član 116.

Općinske, kantonalne i federalne vlasti djeluju zajednički na partnerskim osnovama, osim u oblasti administrativnog nadzora koji vrše federalni i kantonalni organi vlasti u pogledu rada vlasti u općini.

Član 117.

Općina je dužna informisati federalne, odnosno kantonalne vlasti o svim pitanjima i problemima značajnim za izvršavanje prenesenih nadležnosti, a naročito o problemima u provođenju utvrđene politike i izvršavanju propisa.

Član 118.

Federalne, odnosno kantonalne vlasti dužne su razmotriti inicijative, prijedloge i sugestije Općine i o svom stavu i preduzetim aktivnostima obavijestiti Općinu u roku od 30 dana od dana prijema inicijative, prijedloga ili sugestije.

Član 119.

U vršenju povjerenih ovlašćenja i izvršavanju prenesenih nadležnosti općina će primjenjivati uputstva i smjernice koje dobiju od federalnih i kantonalnih vlasti u skladu sa Zakonom.

Član 120.

Federalne, odnosno kantonalne vlasti dužne su u najvećoj mogućoj mjeri konsultovati jedinice lokalne samouprave u postupku donošenja propisa koji ih se direktno tiču.

XV SARADNJA SA OMBUDSMENIMA

Član 121.

Općina osigurava saradnju sa ombudsmenima.

Općina će ombudsmenu, na njegov zahtjev, omogućiti ispitivanje djelatnosti bilo koje institucije Općine koje su povrijedile ljudsko dostojanstvo, prava i slobode, uključujući provođenje etničkog progona ili održavanje njegovih posljedica, omogućiti istraživanje svih dokumenata uključujući tajna dokumenta i omogućiti saradnju od svake osobe uključujući bilo kog službenika, posebno o pribavljanju potrebnih informacija, dokumenata i spisa.

XVI SARADNJA I UDRUŽIVANJE OPĆINE

Član 122.

Općina ima pravo da u obavljanju svojih nadležnosti saraduje sa drugim jedinicama lokalne samouprave radi obavljanja poslova od zajedničkog interesa i u tom cilju mogu se udruživati u zajednice i saveze u skladu sa ustavom i zakonom i Evropskom poveljom o lokalnoj samoupravi.

Ciljevi, uslovi, institucije, saradnja i međusobne obaveze, pravna i organizacijska pitanja, finansijski odnosi i način rješavanja sporova utvrđuje se sporazumom.

Sporazum iz prethodnog stava obavezno se dostavlja Vladi Kantona.

Zajednice jedinica lokalne samouprave su pravne osobe i imaju svoj statut.

Član 123.

Općina može uspostavljati trajne prijateljske odnose sa drugim općinama ili gradovima u državi i inostranstvu na području privredne, naučno-tehničke, kulturno-prosvjetne i drugih oblika saradnje.

Općina može pristupiti međunarodnim udruženjima lokalnih jedinica, saradivati sa njima, odnosno zajednicama i udruženjima drugih država u skladu sa Ustavom, zakonom i Evropskom poveljom o lokalnoj samoupravi.

U slučaju iz stav 1. i 2. odluku donosi Općinsko vijeće.

Član 124.

Općina se može udruživati u saveze općina i gradova na nivou Bosne i Hercegovine i Federacije BiH radi zaštite zajedničkih interesa kao i promoviranja i unapređenja lokalne samouprave, zaštite zajedničkog interesa.

Odluku o osnivanju saveza odnosno odluku o pristupanju savezu donosi Općinsko vijeće.

XVII UPRAVNI NADZOR NAD RADOM JEDINICA LOKALNE SAMOUPRAVE

Član 125.

Upravni nadzor nad aktivnostima jedinica lokalne samouprave vrše nadležni federalni i kantonalni organi u okviru svojih odgovarajućih područja nadležnosti. Upravni nadzor nad aktivnostima Općine vrši se samo u slučajevima utvrđenim zakonom tako da ne ograničava pravo organa Općine da samostalno i u skladu sa zakonom upravljaju javnim poslovima koji spadaju u djelokrug njihovih vlastitih nadležnosti. Nadzor u pogledu zakonitosti i ekspeditivnosti donesenih odluka može se vršiti u odnosu na poslove čije je obavljanje povjereno Općini. Federalni i kantonalni organi mogu zajednički vršiti nadzor nad ekspeditivnošću u donošenju odluka.

Sve konačne odluke koje se odnose na poništavanje ili preinačavanje akata jedinica lokalne samouprave, usvojenih u okviru njihovih vlastitih nadležnosti, donosi nadležni sud.

Postupak vršenja upravnog nadzora nad aktivnostima jedinice lokalne samouprave utvrđuje se zakonom.

Član 126.

Upravni nadzor nad radom organa Općine u vršenju vlastitih nadležnosti kao jedinice lokalne samouprave vršit će se na način da se ojača uloga nezavisnih tijela, te unutrašnji mehanizmi nadzora, posebno u oblastima finansija i upravljanja.

Posebim aktom će se regulisati mehanizmi interne revizije iz oblasti finansija i upravljanja.

Član 127.

Nadzor nad provođenjem ovog Statuta vrši Komisija za statutarna pitanja i propise.

Član 128.

Organi općine odgovorni su za hitnu i potpunu provedbu privremene mjere i sudske odluke koje sud donese u okviru svoje nadležnosti u vezi s nadzorom nad radom organa Općine.

XVIII POVJERAVANJE JAVNIH OVLAŠTENJA IZ SAMOUPRAVNOG DJELOKRUGA

Član 129.

Obavljanje pojedinih upravnih i stručnih poslova iz samoupravnog djelokruga općine, izuzev poslova inspekcijskog nadzora može se Odlukom Općinskog vijeća, u skladu sa Zakonom, povjeriti ustanovama i drugim pravnim licima s javnim ovlaštenjima.

Odluka Općinskog vijeća kojom se povjeravaju javna ovlaštenja određuje se i način obavljanja tih ovlaštenja kao i prava dužnosti obavljanja nadzora nad izvršenjem tih povjerenih ovlaštenja.

Upravni nadzor nad radom institucija kojima su povjerena javna ovlaštenja obavlja Općinski/a načelnik/ca u skladu sa zakonom o lokalnoj samoupravi i Odlukom iz ovog člana.

Član 130.

U obavljanju upravnog nadzora nad radom institucija kojima se povjeravaju javna ovlaštenja Općinski/a načelnik/ca ima pravo i dužnost naročito:

- provoditi inspekcijski nadzor i u skladu sa svojim nadležnostima osigurati obavljanje poslova iz javnog ovlaštenja zakonito i u skladu sa propisom Općinskog vijeća,
- rješavati po žalbama protiv donesenih upravnih akata u obavljanju povjerenih javnih ovlaštenja, kada je to utvrđeno odlukom iz prethodnog člana,

- po potrebi davati stručna uputstva i objašnjenja za primjenu zakona i drugih propisa koji se odnose na obavljanje povjerenih javnih ovlaštenja,
- preduzimati druge mjere, izvršavati druga prava koja po zakonu ima drugostepeni organ u upravnom postupku.

Institucije koje imaju javna ovlaštenja dužne su općinskom/j načelniku/ci najmanje jedanput godišnje podnijeti izvještaj o obavljanju povjerenih javnih ovlaštenja i na njegovo traženje dostavljati određene podatke i dokumente značajne za obavljanje nadzora nad obavljanjem povjerenih ovlaštenja.

Član 131.

U okviru samoupravno djelokruga Općina može da osnuje ustanove, javne ustanove, u skladu sa zakonom, kao i javna preduzeća u cilju obavljanja djelatnosti od javnog društvenog interesa. Upravni odbori odnosno Nadzorni odbori javnih ustanova i javnih preduzeća dužni su najmanje jednom godišnje podnijeti izvještaje svom radu i radu navenih pravnih subjekata Općinskom vijeću na razmatranje.

XIX– PRELAZNE I ZAVRŠNE ODREDBE

Član 132.

Danom stupanja na snagu ovog Statuta prestaje da važi Statut Općine Konjic («Službeni glasnik Općine Konjic» broj: 4/01,5/04, 3/08).

Općina će uskladiti svoje propise i akte sa ovim Statutom najkasnije u roku od šest mjeseci od dana stupanja na snagu ovog Statuta.

Stupanjem na snagu ovog Statuta prestaju da važe odredbe propisa i drugih akata Općine koje su u suprotnosti sa ovim Statutom.

Član 133.

Prenos poslova i nadležnosti dodijeljenih Zakonom o principima lokalne samouprave u Federaciji BiH, kao i odgovornost Općine za njihovo vršenje, počet će istovremeno s prijenosom sredstava potrebnih za njihovo obavljanje.

Član 134.

Ovaj Statut stupa na snagu narednog dana od dana objavljivanja u «Službenom glasniku Općine Konjic» i ima se objaviti na Oglasnoj tabli Općine Konjic.

Broj : 03-05-12-1696/11
Konjic,09.06.2011.godine

**PREDSJEDNIK
OPĆINSKOG VIJEĆA**
Ivica Ružić, dipl. ing strojarstva